

ԾՆՈՒՆԴԻ ԲԱՐԻ, «ԱՐՅԱԽԱԿԱՆՉ»

Ակամայից ունկնդիր լինելով մի խումբ մարդկանց գրույցին, մտածումների մեջ ընկա. վերջապես, ո՞րն է ճշմարտությունը: Ախր, մեր կյանքի, թվում է, թե այրուքենային ճշմարտության ընկալումը տարամերժ է. մեկն ասում էր, թե հիմա կյանքն ազատ է, թերթերը շատացել են, ամեն ինչ էլ գրում են, իսկ մյուսը ձեռքն էր թափ տալիս. «Դրանից ի՞նչ օգուտ՝ զերիք հա գրիր, ինչ սիրտդ ուզում է՝ ասա ո՛վ է քեզ լսողը, քո խոսքը բանի տեղ դնում. հիմա էլ խոսքի «ինֆլացիա» Լ. Զանա»:

Ըստ երևույթին, երկուսն էլ ճիշտ բաներ էին ասում: Իրավ, այսօր մի տեսակ ճշմարիտ խոսքը, ինչպես ժողովուրդն է ասում, ականջի տակով է անցնում: Օրինակ, խնդրեմ, քանի-քանի անգամ Լ գրվել Արցախում՝ Ադրբեջանի կողմից. խորհրդային ներքին գործերի մարտիկների մասնակցությամբ, կատարվող բռնությունների մասին, բայց ոչինչ չի փոխվում: Ըստ երևույթին, սա ևս նոր երևույթ է, որը կարելի է համարել այն սև ստվերը, որ մշտապես հետևում է դեմոկրատացման լուսավոր ընթացքին: Եվ պիտի կարծենք, որ այդ մութ ստվերները աստիճանաբար կփոքրանան, և ի վերջո. կչքվեն, եթե դեմոկրատիայի լույսերն ավելի բուկվեն: Եվ, կարծում եմ, որ հենց դեմոկրատիայի այդ լույսերից են նաև այն լրագրերը, շաբաթաթերթերը, որոնք հետըզհետե շատանում են մեր կյանքում և այդ բազմացումը մարդիկ սրամտորեն անվանում են՝ անձրևից հետո սնկերի աճում: Ինչ էլ լինի, անձրևը բարեբեր է և աճող սունկերն էլ յուրատեսակ բարիք են մեր կյանքում:

Բազում թերթերի մեջ մեզ համար վաղուց սպասվածն էր «Արցախական» շաբաթաթերթը, որը լույս է ընծայում «Արցախ» հայրենակցական միությունը: Թեև ևս այդ թերթի դերն ու նշանակությունը մեկնաբանելու հարկ չկա, բոլորին հայտնի է, որ նա եկել է ճշմարտացի տեղեկությամբ, փաստերի տրամաբանությամբ գործացնելու այն պայքարը, որը մղում է Արցախի հայությունը՝ միջազգային իրավունքով վերապահված իր ինքնորոշումը հաստատելու համար: Միայն նշենք, թե ինչպիսի պայմաններում է ծնունդ առել «Արցախականը»: Իսկ դրա համար ավելի շիտ կլինի մեջբերում անել «Մուտք» վերնագրով, իմ կարծիքով առաջին համարի համար խիստ անհրաժեշտ, խմբագրականի վերջին տողերը.

«Աշխարհի և ոչ մի ծայրում աստվածապաշտ և ոչ մի հավատացյալ չի կարող հանգիստ լինել, — ինչ հավատք էլ նա ունենա, — երբ Արցախում գնդակոծվում և ավերվում են եկեղեցիները, հալածվում նրա սպասավորները:

Աշխարհում և ոչ մի ժողովուրդ չի կարող վստահ լինել իր ապագայի համար, քանի դեռ կան Սումգայիթ կազմակերպող, ժողովրդի կամքին բռնացող ուժեր: Պատմությունը երկար սպասել չտվեց անպատիժ մնացած սումգայիթյան ուժերին երևալու՝ Նովի Ուզենում, Տուվայում, Օշում...»

Նույն ուժերն են գրավել երկրի լրատրվական միջոցները՝ փորձելով փարիսե-

ցիության (կեղծիքի) հեղեղի մեջ խեղդել հասարակական գիտակցությունը: Տեղեկատվական տեղորի թունոտ նետերը առաջին հերթին ուղղված են Արցախի դեմ: Ահա այսպիսի պայմաններում է ասպարեզ իջնում «Արցախականը»:

Համաձայնենք, իրոք, տագնապալի ժամանակներ է ապրում Արցախը՝ ընդհանուր առմամբ մեր ոչ դյուրին և ոչ անհանգիստ օրերի մեջ: Եվ հենց դրա համար էլ, որպեսզի մենք էլ չուշանանք հաճախ ուշացող զինվորների պես, մեր ունկնդիրներին միշտ պետք է հասնի Արցախի ձայնը, Արցախի կանչը, որը մեզ կրերի «Արցախականը»:

Իմ այս մտորումը սքանչելիորեն մարմնավորում է մեծ հայրենասեր Ջորի Բալայանի խոսքը, որը տպագրված է թերթի հենց ճակատին և, որը արցախցիների երազանքը գործով ու պայքարով իրողություն դարձնելու յուրօրինակ մի հորդոր է, արցախցիներին Արցախի փրկությանն ու վերածնությանը հրավիրելու սրտի կանչը:

Ահա այն. «Արցախական» չի նշանակում միայն Արցախի կանչ, այլև այն, որ Արցախը կարիք ունի մոր կանչի: Կանչը միշտ էլ հույս է: Հույս, որը մենք երբեք չենք կորցնում, որը երբեք չի լքի արցախցուն, քանի նա կենդանի է: «Արցախականը» ոչ միայն օգնության է կանչում, ոչ միայն զարթոնքի է կոչում, ոչ միայն պարտավորեցնում է լինել առաջին գծում, այլև գործուն հույսը դնում է հենց արցախցիների վրա: Մեր փոխարեն ոչ ոք չի պայքարելու հայրենի օջախի համար, մեր փոխարեն ոչ ոք չի հերկելու հայրենի հողը, մեր փոխարեն ոչ ոք չի իրագործելու մեր նախնիների երազանքը «Արցախականը» մեզ այսօր նույնքան անհրաժեշտ է, որքան մեր բազմաշարշար պատմության մեջ անհրաժեշտ էր «Ռանչպարների կանչը»:

Շաբաթաթերթի այս անդրանիկ համարում խորհմաստ և սրտառույ խոսք ունի Արցախի հարցում միշտ Ջորի Բալայանին զորավիզ, միշտ նրա կողքին կանգնած Սոս Սարգսյանը, որից արվող այս մեջբերումները ձեզ շատ բան կպատմեն: Իրավ, Արցախն այսօր հայոց այն երկրամասն է, որին արժանի լինելու պարտքն ունի ամեն մի հայ և, որով պիտի չափվի մեր նվիրվածությունը: «Գիտենք՝ զարթնել ենք ու կանգնել նոր ճամփի գլխին... Գիտի մեր քայն անենք, մեր նոր քայլը, որ ծանր է ու դժվար... Զարթնել ենք, ու զարթնեցնողը համայն հայության դու ես եղել, իմ Արցախ, իմ քույր ու եղբայր, դու, դու, որից ես ոչ մի օր չեմ բաժանվում: Եվ դու չպետք է երերաս, չախտի ընկերկես, մեր ետևինը անդունդն է... Մեր քրավանի նառն ու առաջնորդը դու ես այսօր: Ու կտրել ես անապատը, մեր բախտի աստղ, մեր կապույտ հորիզոն Արցախ: Դուրս արի քարի արանքից, նորից ցվիր իմաստությամբ, հրաշք գործիր, Մովսեսի նման գերությունից ազատիր ցեղը հայոց»:

«Արցախական» հենց առաջին համարում սրտամոտ անուններ կան, որոնց մասին չես կարող չասել, և, որոնք ոչ միայն «Արցախական» զարդն են, այլև՝ խորհրդանիշը՝ Արցախով ապրած ու ապրող, Արցախով շնչող գրողներ՝ Հովհաննես Շիրազ, Բագրատ Ուլուբաբյան, Գրիգոր Բաղասանյան, Հրաչյա Բեգլարյան...»

Նաև ասենք, որ խմբագիրը՝ Մուշեղ Բաղդասարյանը, նույնպես արցախցի է և թերթի հենց առաջին համարով լավ հայտ է ներկայացրել:

Վերջում մի ցանկություն իմ կողմից թող Արցախի կանչը ուրախության կանչ լինի. ծնունդը բարի, «ԱՐՅԱԽԱԿԱՆՉ»:

Վլադիմիր ՄՈՎՍԻՍՅԱՆ
Հաղորդվել է արտասահմանի համար՝ հայերեն և այլ լեզուներով, 1990 թ. նոյեմբերի 24-ին:

